

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : DATIN MASTURA BINTI MOHD YAZID
[KUALA KANGSAR]**

TARIKH : 10 JULAI 2019 (RABU)

SOALAN :

Datin Mastura binti Mohd Yazid [Kuala Kangsar] minta PERDANA MENTERI menyatakan apakah kategori-kategori tanah wakaf milik Majlis Agama Islam dan Adat Istiadat Melayu di negeri-negeri Semenanjung.

JAWAPAN: (YB DATUK SERI DR. MUJAHID BIN YUSOF, MENTERI DI JABATAN PERDANA MENTERI)

Tuan Yang Dipertua,

Secara umumnya, wakaf terbahagi kepada dua (2) kategori, iaitu **Wakaf Ahli** yang dikhususkan manfaatnya kepada ahli keluarga dan **Wakaf Khairi**. Wakaf Khairi pula terbahagi kepada dua (2) iaitu Wakaf Am dan Wakaf Khas.

Kategori tanah wakaf sedia ada milik Majlis Agama Islam Negeri-negeri (MAIN) adalah sepertimana yang dinyatakan di dalam Kanun Tanah Negara (KTN) iaitu sama ada pertanian, bangunan atau perusahaan (perindustrian) dan kategori tanah ini ada dinyatakan di dalam geran tanah. Walau bagaimanapun, kategori tanah wakaf boleh berubah berdasarkan permohonan untuk pembangunan atau sebagainya oleh MAIN setelah melalui beberapa proses tukar syarat tanah dengan bayaran yang telah ditetapkan oleh Pejabat Tanah Negeri.

Untuk makluman Ahli Yang Berhormat juga,

Berdasarkan kepada Kajian Pelan Induk Transformasi Pembangunan Hartanah Wakaf di Malaysia, telah diterbitkan oleh Yayasan Wakaf Malaysia (YWM) dengan kerjasama Majlis Agama Islam Negeri-Negeri (MAIN) pada tahun 2016. Semua tanah-tanah wakaf yang telah dibangunkan atau yang akan dibangunkan adalah berdasarkan kepada kategori-kategori iaitu:

- i. Keagamaan
- ii. Pendidikan
- iii. Kesihatan
- iv. Pertanian (industri makanan / penternakan / perladangan)
- v. Perumahan
- vi. Perniagaan dan perkhidmatan
- vii. Infrastruktur dan kemudahan

Tuan Yang Dipertua,

Sebagai sebuah Kerajaan Persekutuan dan menerusi pembahagian kuasa perundangan antara persekutuan dengan negeri dalam Perlembagaan Persekutuan, undang-undang wakaf di Malaysia adalah di bawah bidang kuasa negeri dan pentadbirannya diperuntukkan dalam enakmen pentadbiran agama Islam atau enakmen undang-undang Islam di setiap negeri seperti mana yang dinyatakan di dalam Butiran 1, Senarai 2, Jadual Kesembilan, Perlembagaan Persekutuan. Oleh itu, MAIN selaku pemegang amanah tunggal bagi semua harta wakaf sama ada berbentuk harta alih atau harta tak alih di negeri masing-masing dan bertanggungjawab untuk memastikan harta wakaf diuruskan dengan sebaiknya. Oleh yang demikian, sebarang bentuk dan jenis wakaf yang hendak dilaksanakan perlulah mendapat kebenaran dari MAIN yang terlibat sepertimana yang dinyatakan di dalam enakmen wakaf dan Enakmen Pentadbiran Agama Islam Negeri.

Sekian, terima kasih.